

四庫全書

集部

欽定四庫全書

集部

御定全唐詩卷四百四十六

七

詳校官庶吉士_臣胡鈺

主事銜_臣徐以坤覆勘

總校官知縣_臣繆琪

校對官助教_臣羅萬選

謄錄監生_臣姚培雯

欽定四庫全書

御定全唐詩卷四百四十六

白居易

元微之除浙東觀察使喜得杭越鄰州先贈長

句

十七首並與微之和答

稽山鏡水歡遊地犀帶

一作角

金章榮貴身官職比君雖

校小封疆與我且為鄰郡樓對翫千峰

一作望
千山

月江界

平分兩岸春杭越風光詩酒主相看更合與何人

席上荅微之

我住浙江西君去浙江東勿言一水隔便與千里同富
貴無人勸君酒今宵為我盡杯中

荅微之上船後留別

燭下尊前一分手舟中岸上兩迴頭歸來虛白堂中夢
合眼先應到越州

荅微之泊西陵驛見寄

一無泊字

煙波盡處一點白應是西陵古驛臺知在臺邊望不見

暮潮空送渡船迴

荅微之誇越州州宅

賀上人回得報書大誇州宅似仙居
厭看馮翊風沙久喜見蘭亭煙景初
日出旌旗生氣色月明樓閣在空虛
知君暗數江南郡除却餘杭盡不如

微之重誇州居其落句有西州羅刹之謔因嘲
茲石聊以寄懷

君問西州城下事醉中疊紙為君書
嵌空石面標羅刹

壓捺潮頭敵子胥神鬼曾鞭猶不動波濤雖打欲何如
誰知太守心相似抵滯堅頑兩有餘

張十八員外以新詩二十五首見寄郡樓月下
吟翫通夕因題卷後封寄微之

秦城南省清秋夜江郡東樓明月時去我三千六百里
得君二十五篇詩陽春曲調高難和淡水交情老始知
坐到天明吟未足重封轉寄與微之

酬微之

微之題云郡務稍簡因得整集舊詩并
連綴刪削封章諫草繁委箱笥僅踰百

軸偶成自歎

兼寄樂天

滿裘

一作篋

填箱唱和詩少年為戲老成悲聲聲麗曲敲

寒玉句句妍辭綴色絲吟翫獨當明月夜傷嗟同是白

頭時由來才命相磨折天遣無兒欲怨誰

微之句云天遣兩家無嗣

子欲將文字付誰人故以此答之

餘思未盡加為六韻重寄微之

一作微之整集舊詩及文筆為

百軸以七言長句寄樂天樂天次韻酬之餘思未盡加為六韻

海內聲華併在身篋中文字絕無倫

美微之也

遙知獨對封

章草忽憶同為獻納臣走筆往來盈卷軸

予與微之前後寄和詩數

百篇近代無如此多有也

除官逋互掌絲綸

予除中書舍人微之撰制詞微之除翰林學士

予撰制詞

制從長慶辭高古

微之長慶初知制誥文格高古始變俗體繼者効之也

詩

到元和體變新

衆稱元白為千字律詩或號元和格

各有文姬才稚齒

蔡邕

無兒有女琰字文姬

俱無通子繼餘塵

陶潛小兒名通子

琴書何必求王

祭與女猶勝與外人

荅微之詠懷見寄

閣中同直前春事船裏相逢昨日情分袂二年勞夢寐

並牀三宿話平生
紫微北畔辭宮闕
滄海西頭對郡城
聚散窮通何足道
醉來一曲放歌行

酬微之誇鏡湖

我嗟身老歲方徂
君更官高興轉孤
軍門郡閣曾閑否
禹穴耶溪得到無
酒盞省陪波卷白
骰盤思共彩呼盧

一泓鏡水誰能羨
自有胷中萬頃湖

微之詩云孫園虎寺隨宜看不必遙

遙羨鏡湖故以此戲言答之

雪中即事答

一作寄

微之

連夜江雲黃慘澹平明山色白模糊銀河沙漲三千里
梅嶺花排一萬株北寺風生飄散麝東樓日出照凝酥
誰家高士關門戶何處行人失道途舞鶴庭前毛稍定
擣衣砧上練新鋪戲團稚女呵紅手愁坐衰翁對白鬚
壓瘴一州除疾苦呈豐萬井盡歡娛含玉德懷君子
寒助霜威憶大夫莫道煙波一水隔何妨氣候兩鄉殊
越中地暖多成雨還有瑤臺瓊樹無

醉封詩筒寄微之

一生休戚與窮通處處相隨事事同未死又隣滄海郡
無兒俱作白頭翁展眉只仰三楮後代面唯憑五字中
為向兩州郵吏道莫辭來去遞詩筒

除夜寄微之

鬢毛不覺白毵毵一事無成百不堪共惜盛時辭闕下
同嗟除夜在江南家山泉石尋常憶世路風波子細諳
老校於君合先退明年半百又加三

蘇州李中丞以元日郡齋感懷詩寄微之及予

輒依來篇七言八韻走筆奉荅兼呈微之

白首餘杭白太守落魄

一作拓

拋名來已久一辭渭北故

園春再把江南新歲酒
枯前笑歌徒勉強鏡裏形容漸
衰朽領郡慙當潦倒年
鄰州喜得平生友長洲草接松
江岸曲水花連鏡湖口
老去還能痛飲無春來曾作閒
遊否憑鶯傳語報李六倩鴈將書與元九
莫嗟一日日催人且貴一
年年入手

早春西湖閒遊悵然興懷憶與微之同賞因思

在越官重事殷鏡湖之遊或恐未暇偶成十八

韻寄微之

上馬復呼賓湖邊景氣新管弦三數事騎從十餘人立
換登山屐行攜漉酒巾逢花看當妓遇草坐為茵西日
籠黃柳東風蕩白蘋小橋裝鴈齒輕浪梵魚鱗畫舫牽
徐轉銀船酌慢巡野情遺世累醉態任天真彼此年將
老平生分最親高天從所願遠地得為鄰雲樹分三驛
煙波限一津齟嗟寸步隔却厭尺書頻浙右稱雄鎮山

陰委重臣貴垂長紫綬榮駕大朱輪出動刀槍隊歸生
道路塵鴈驚弓易散鷗怕鼓難馴百吏瞻相面千夫捧
擁身自然閒興少應負鏡湖春

荅微之見寄

時在郡樓對雪

可憐風景浙東西先數餘杭次會稽禹廟未勝天竺寺
錢湖不羨若耶溪擺塵野鶴春毛暖拍水沙鷗濕翅低
更對雪樓君愛否紅欄碧甃點銀泥

祭社宵興燈前偶作

城頭傳鼓角燈下整衣冠
夜鏡藏鬚白秋泉漱齒寒
欲將閒送老須著病辭官
更待年終後支持歸計看

閒卧

盡日前軒卧神閒境亦空
有山當枕上無事到心中
簾卷侵牀日屏遮入座風
望春春未到應在海門東

新春江次

浦乾潮未應堤濕凍初銷
粉片妝梅朶金絲刷柳條
鴨頭新綠水鴈齒小紅橋
莫怪珂聲碎春來五馬驕

春題湖上

湖上春來似畫圖
亂峰圍繞水平鋪
松排山面千重翠
月點波心一顆珠
碧毯線頭抽早稻
青羅裙帶展新蒲
未能拋得杭州去
一半句留是此湖

早春憶微之

昏昏老與病相和
感物思君歎復歌
聲早雞先知夜短
色濃柳最占春多
沙頭雨染斑斑草
水面風驅瑟瑟波
可道眼前光景惡
其如難見故人何

失鶴

失為庭前雪飛因海上風九霄應得侶三夜不歸籠聲
斷碧雲外影沈明月中郡齋從此後誰伴白頭翁

自感

一作
自歎

宴遊寢食漸無味
杯酒管弦徒繞身
賓客歡娛僮僕飽
始知官職為他人

得湖州崔十八使君書喜與杭越鄰郡因成長
句代賀兼寄微之

三郡何因此結緣貞元科第忝同年故情歡喜開書後
舊事思量在眼前越國封疆吞碧海杭城樓閣入青煙
吳興卑小君應屈為是蓬萊最後仙

貞元初同登科崔君名最在後當時

崔自詠云人間不會雲間事應笑蓬萊最後仙

同諸客攜酒早看櫻桃花

曉報櫻桃發春攜酒客過綠錫黏盞杓紅雪壓枝柯天
色清明少人生事故多停杯替花語不醉擬如何

柳絮

三月盡是頭白日與春老別更依依憑鶯為向楊花道
絆惹春風莫放歸

早飲湖州酒寄崔使君

一榼扶頭酒泓澄瀉玉壺十分蘸甲酌漱澁滿銀盃捧
出光華動嘗看氣味殊手中稀琥珀舌上冷醍醐瓶裏
有時盡江邊無處沽不知崔太守更有寄來無

病中書事

三載卧山城閒知節物情鶯多過春語蟬不待秋鳴氣

嗽因寒發風痰欲雨生病身無所用唯解卜陰晴

與微之唱和來去常以竹筒貯詩陳協律美而

成篇因以此答

揀得琅玕截作

一作短

筒緘題章句寫心胃隨風每喜飛

如鳥渡水常憂化作龍粉節堅如太守信霜筠冷稱大
夫容煩君讚詠心知愧魚目驪珠同一封

醉戲諸妓

席上爭飛使君酒歌中多唱舍人詩不知明日休官後

逐我東山去是誰

北院

北院人稀到東窗事最偏竹煙行竈上石壁卧房前性
拙身多暇心情事少緣還如病居士唯置一牀眠

酬周協律

五十錢唐守應為送老官濫蒙辭客愛猶作近臣看鑿
落愁須飲琵琶悶遣彈白頭雖強醉不似少年歡

題石山人

騰騰兀兀在人間貴賤賢愚盡往還羶膩筵中唯飲酒
歌鐘會處獨思山存神不許三尸住混俗無妨兩鬢斑
除却餘杭白太守何人更解愛君閒

詩解

新篇日日成不是愛聲名舊句時時改無妨悅性情但
令長守郡不覺一作覓却歸城祇擬江湖上吟哦過一生

潮

早潮纔落晚潮來一月周流六十回不獨光陰朝復暮

杭州老去被潮催

聞歌妓唱嚴郎中詩因以絕句寄之

嚴前為郡守

已留舊政布中和又付新詞與豔歌
但是人家有遺愛就中蘇小感恩多

柘枝妓

平鋪一合錦筵開連擊三聲畫鼓催
紅蠟燭移桃葉起紫羅衫動柘枝來
帶垂鈿胯花腰重帽轉金鈴一作雪鈿
面迴看即曲終留不住雲飄雨送向陽臺

急樂世辭

樂府詩作
急世樂

正抽碧線繡紅羅
忽聽黃鶯斂翠蛾
秋思冬愁春悵望

大都不稱

一作
得

意時多

天竺寺送堅上人歸廬山

錫杖登高寺香爐憶舊峰
偶來舟不繫忽去鳥無蹤
豈要留離偈寧勞動別容
與師俱是夢夢裏暫相逢

除官赴闕留贈微之

去年十月半君來過浙東
今年五月盡我發向關中
兩

鄉默默心相別一水盈盈路不通從此津人應省事寂寥無復遞詩筒

留題郡齋

吟山歌水嘲風月便是三年官滿時春為醉眠多閉閣秋因晴望暫褰帷更無一事移風俗唯化州民解詠詩

別州民

耆老遮歸路壺漿滿別筵甘棠無一樹那得淚潜然稅重多貧戶農饑足旱田唯留一湖水與汝救凶年

今春增築

錢唐湖堤貯水
以防天旱故云

留題天竺靈隱兩寺

在郡六百日入山十二回宿因月桂落醉為海榴開

天竺

嘗有月中桂子落靈隱多海石榴花也

黃紙除書到青宮詔命催僧徒多

悵望賓從亦裴回寺閣煙埋竹林香雨落梅別橋憐白

石辭洞戀青苔

石橋在天竺明洞在靈隱

漸出松間路猶飛馬上栳

誰教冷泉水送我下山來

西湖留別

征途行色慘風煙祖帳離聲咽管絃翠黛不須留五馬
皇恩只許住三年綠藤陰下鋪歌席紅藕花中泊妓船
處處回頭盡堪戀就中難別是湖邊

重寄別微之

憑仗江波寄一辭不須惆悵報微之猶勝往歲峽中別
滯潏堆邊招手時

重題別東樓

東樓勝事我偏知氣象多隨昏旦移湖卷衣裳白重疊

山張屏障綠參差海仙樓塔晴方出江女笙簫夜始吹

春雨星攢尋蟹火秋風霞颭弄濤旗

餘杭風俗每寒食雨後夜涼家家持

燭尋蟹動盈萬人每歲八月迎濤弄水者悉舉旗幟焉

宴宜雲髻新梳後曲愛霓

裳未拍時太守三年嘲不盡郡齋空作百篇詩

別周軍事

主人頭白官仍冷去後憐君是底人試謁會稽元相去
不妨相見却殷勤

看常州柘枝贈賈使君

莫惜新衣舞柘枝也從塵污汗霑垂料君即却歸朝去
不見銀泥衫故時

汴河路有感

三十年前路孤舟重往還繞身新眷屬舉目舊鄉關事
去唯留水人非但見山啼襟與愁鬢此日兩成斑

埭槁舊業

別業埭城北拋來二十春改移新逕路變換舊村鄰有
稅田疇薄無官弟姪貧田園何用問強半屬他人

茅城驛

汴河無景思秋日又淒淒地薄桑麻瘦村貧屋舍低早
苗多間草濁水半和泥最是蕭條處茅城驛向西

河陰夜泊憶微之

憶君我正泊行舟望我君應上郡樓萬里月明同此夜
黃河東面海西頭

杭州廻舫

自別錢塘山水後不多飲酒嬾吟詩欲將此意憑迴櫂

報與西湖風月知

途中題山泉

決決涌巖穴濺濺出洞門
向東應入海從此不歸源
似葉飄辭樹如雲斷別根
吾身亦如此何日返鄉園

欲到東洛得楊使君書因以此報

向公心切向財疎
淮上休官洛下居
三郡政能從獨步
十年生計復何如
使君灘上久分手
別駕渡頭先得書
且喜平安又相見
其餘外事盡空虛

洛下寓居

秋館清涼日書因解悶看夜窗幽獨處琴不為人彈遊
宴慵多廢趨朝老漸難禪僧教斷酒道士勸休官渭曲
莊猶在錢唐俸尚殘如能便歸去亦不至飢寒

味道

叩齒晨興秋院靜焚香冥坐晚窗深七篇真誥論仙事
一卷檀經說佛心此日盡知前境妄多生曾被外塵侵
自嫌習性猶殘處愛詠閒詩好聽琴

好聽一作琴

本性好

一作愛

絲桐塵機聞即空一聲來耳裏萬事離心

中清暢堪銷疾恬和好養蒙尤宜聽三樂安慰白頭翁

愛詠詩

辭章諷詠成千首心行歸依向一乘坐倚繩牀閒自念
前生應是一詩僧

酬皇甫庶子見寄

掌綸不稱君應笑典郡無能我自知別詔忽驚新命出

同寮偶與夙心期春坊瀟灑優閒地秋鬢蒼浪老大時
獨占二疏應未可龍樓見擬覓分司

卧疾

閒官卧疾絕經過居處蕭條近洛河水北水南秋月夜
管弦聲少杵聲多

遠師

東宮白庶子南寺遠禪師何處遙相見心無一事時

問遠師

葦簾停夜食吟詠散秋懷笑問東林老詩應不破齋

小院酒醒

酒醒閒獨步小院夜深涼一領新秋簟三間明月廊未
收殘盞杓初換熱衣裳好是幽眠處松陰六尺牀

贈侯三郎中

老愛東都好寄身足泉多竹少埃塵年豐最喜唯賓客
秋冷先知是瘦人幸有琴書堪作伴苦無田宅可為鄰
洛中縱未長居得且與蘇田遊過春

求分司東都寄牛相公十韻

忽忽心如夢，星星鬢似絲。縱貧長有酒，雖老未拋詩。儉
薄身都慣，疎頑性頗宜。飯麤飧亦飽，被暖起常遲。萬里

歸何得，三年伴是誰。華亭鶴不去，天竺石相隨。

余罷杭
州得華

亭鶴天竺石
同載而歸

王尹貫將馬，田家賣與池。開門閒坐日，遶

水獨行時。嬾漫交遊許，衰羸相府知。官寮幸無事，可惜
不分司。

酬楊八

君以曠懷宜靜境我因蹇步稱閒官
閉門足病非高士勞作雲心鶴眼看

履道新居二十韻

履道坊西角官河曲北頭
林園四鄰好風景一家秋
門閉深沈樹池通淺沮

秋夜反

溝拔青松直上鋪碧水平流

籬菊黃金合窗筠綠玉稠
疑連紫陽洞似到白蘋洲
僧至多同宿賓來輒少留
豈無詩引興兼有酒銷憂
移榻臨平岸攜茶上小舟
果穿聞鳥啄萍破見魚遊
地與塵

相遠人將境共幽
汎潭菱點鏡沈浦月生鉤
厨曉煙孤起庭寒雨
半收老飢初愛粥瘦冷早披裘
洛下招新隱秦中忘舊遊
辭章留鳳閣班籍寄龍樓
病慙官曹靜閒慙俸祿優
琴書中有得衣食外何求
濟世才無取謀身智不周
應須共心語萬事一時休

九日思杭州舊遊寄周判官及諸客

忽憶郡南山頂上
昔時同醉是今辰
笙歌委曲聲延耳
金翠動搖光照身
風景不隨宮相去
歡娛應逐使君新

江山賓客皆如舊唯是當筵換主人

秋晚

煙景澹濛濛池邊微有風覺寒菴近壁知暝鶴歸籠長
貌隨年改衰情與物同夜來霜厚薄梨葉半低紅

分司

散秩留司殊有味最宜病拙不才身行香拜表為公事
碧洛青嵩當主人已出閒遊多到夜却歸慵卧又經旬
錢唐五馬留三匹還擬騎遊攪擾春

河南王尹

一作王僕射

初到以詩代書先問之

別來王閣老三歲似須臾鬢上斑多少
柘前興有無官從分緊慢情莫問榮枯
許入朱門否籃輿一病夫

池西亭

朱欄映晚樹金魄落秋池還似錢唐夜
西樓月出時

臨池閒卧

小竹圍庭匝平池與砌連閒多臨水坐
老愛向陽眠營後拋身外幽奇送枕前
誰家臥牀脚解繫釣魚船

吾廬

吾廬不獨貯妻兒自覺年侵身力衰
眼下營求容足地心中準擬掛冠時
新昌小院松當戶履道幽居竹遶池
莫道兩都空有宅林泉風月是家資

題新居寄宣州崔相公

所居南鄰
即崔家池

門庭有水巷無塵好稱閒官作主人
冷似崔羅雖少客寬於蝸舍足容身
疎通竹徑將迎月掃掠莎臺欲待春
濟世料君歸未得南園北曲謾為鄰

憶杭州梅花因叙舊遊寄蕭協律

三年閒悶在餘杭，曾為梅花醉幾場。
伍相廟邊繁似雪，孤山園裏麗如妝。
蹋隨遊騎心長惜，折贈佳人手亦香。
賞自初開直至落，歡因小飲便成狂。
薛劉相次埋新壠，沈謝雙飛出故鄉。
薛劉二客沈謝二妓皆當時歌酒之侶
歌伴酒徒零散盡，唯殘頭白老蕭郎。

病中辱張常侍題集賢院詩因以繼和

天祿閣門開甘泉侍從回，圖書皆帝籍寮友盡仙才。
騎

省通中掖龍樓隔上臺猶憐病宮相詩寄洛陽來

早春晚歸

晚歸騎馬過天津沙白橋紅返照新草色連延多隙地
鼓聲閒緩少忙人還如南國饒溝水不似西京足路塵
金谷風光依舊在無人管領石家春

贈楊使君

曾嗟放逐同巴峽且喜歸還會洛陽時命到來須作用
功名未立莫思量銀銜叱撾欺風雪金屑琵琶費酒漿

更待城東桃李發共君沈醉兩三場

贈皇甫庶子

何因散地共徘徊人道君才我不才
騎少馬蹄生易蹶用稀印鑠澀難開
妻知年老添衣絮婢報天寒撥酒醅
更媿小胥諂拜表單衫衝雪夜深來

池上竹下作

穿籬遶舍碧逶迤十畷閒居半是池
食飽窗間新睡後脚輕林下獨行時
水能性淡為吾友竹解心虛即我師

何必悠悠人世上勞心費目覓親知

閒出覓春戲贈諸郎官

年來數出覓風光亦不全閒亦不忙
放鞍體安騎穩馬
隔袍身暖照晴陽
迎春日日添詩思
送老時時放酒狂
除却髭鬚白一色其餘未伏少年郎

別春爐

暖閣春初入溫爐興稍闌晚風猶冷在
夜火且留看獨
宿相依久多情欲別難誰能共天語
長遣四時寒

汎小輪二首

水一塘輪一隻輪頭漾漾知風起
輪背蕭蕭聞雨滴醉卧船中欲醒時
忽疑身是江南客

船緩進水平流一莖竹篙剔船尾
兩幅青幕覆船頭亞竹亂藤多照岸
如從鳳口向湖州

夢行簡

天氣妍和水色鮮閒吟獨步小橋邊
池塘草綠無佳句

虛臥春窗夢阿憐

一作連

題新居呈王尹兼簡府中三掾

弊宅須重葺貧家乏美財橋憑川守造樹倩府僚栽朱
板新猶濕紅英暖漸開仍期更攜酒倚檻看花來

雲和

非琴非瑟亦非箏撥柱推弦調未成欲散白頭千萬恨
只消紅袖兩三聲

春老

欲隨年少強遊春自覺風光不屬身歌舞屏風花障上

幾時曾畫白頭人

春雪過皇甫家

晚來藍輦雪中回
喜遇君家門正開
唯要主人青眼待
琴詩談笑自將來

崔侍御以孩子三日示其所生詩見示因以二
絕句和之

洞房門上挂桑弧
香水盆中浴鳳雛
還似初生三日魄
嫦娥滿月即成珠

愛惜肯將同寶玉喜歡應勝得王侯弄璋詩句多才思
愁殺無兒老鄧攸

與皇甫庶子同遊城東

閒遊何必多徒侶相勸時時舉一枰博望苑中無職役
建春門外足池臺綠油剪葉蒲新長紅蠟黏枝杏欲開
白馬朱衣兩宮相可憐天氣出城來

洛城東花下作

記得舊詩章花多數洛陽

舊詩云洛陽城東面今來花似雪又云更待城東桃李發

又云花滿洛陽城

及逢花似雪已是鬢成霜向後光陰促從前

事意忙無因重年少何計駐時芳欲送愁離面須傾酒入腸白頭無藉在醉倒亦何妨

晚春寄微之并崔湖州

洛陽陌上少交親履道城邊欲暮春崔在吳興元在越出門騎馬覓何人

城東閒行因題尉遲司業水閣

閒遶洛陽城無人知姓名病乘籃輦出老著茜衫行處

處花相引時時酒一傾借君溪閣上醉詠兩三聲

寄皇甫七

孟夏愛吾廬陶潛語不虛花樽飄落酒風案展開書鄰
女偷新果家僮瀝小魚不知皇甫七池上興何如

訪皇甫七

上馬行數里逢花傾一栢更無停泊處還是覓君來

御定全唐詩卷四百四十六

欽定四庫全書

御定全唐詩卷四百四十七

白居易

除蘇州刺史別洛城東花

亂雪千花落新絲兩鬢生
老除吳郡守春別洛陽城
江上今重去城東更一行
別花何用伴勸酒有殘鶯

奉和汴州令狐令公二十二韻

同用淹字

客有東征者夷門一落帆
二年方得到五日未為淹

相府

領鎮隔年居易方到既
到陪奉遊宴凡經五日
在浚旌重葺遊梁館更添心因

好善樂貌為禮賢謙俗阜知敦勸民安見察廉仁風扇

平聲道路陰雨膏
去聲閭閻文律操將柄兵機釣得鈴碧幢

油葉葉一作業業紅旆火檐檐景象春加麗威容曉助嚴槍

森赤豹尾纛吒黑龍髯門靜塵初歛城昏日半銜選幽

開後院占勝坐前簷平展絲頭毯高褰錦額簾雷槌拓

枝鼓雪擺胡音鵲一作鵲騰衫髮滑歌釵墜妝光舞汗霑回

燈花簇簇過酒玉纖纖饌盛盤心殢醅濃盞底黏陸珍

熊掌爛海味蟹螯鹹福履千夫祝形儀四座

一作海

瞻羊

公長在峴傳說莫歸巖

蓋祝者詞意也

眷愛人人遍風情事事

兼猶嫌客不醉同賦夜厭厭

船夜援琴

鳥棲魚不動月照夜江深身外都無事舟中只有琴七
弦為益友兩耳是知音心靜即聲淡其間無古今

荅劉和州禹錫

換印雖頻命未通歷陽湖上又秋風不教才展休明代

為罰詩爭造化功我亦思歸田舍下君應厭卧郡齋中
好相收拾為閒伴年齒官班約略同

渡淮

淮水東南濶無風渡亦難孤煙生乍直遠樹望多圓春
浪擢聲急夕陽帆影殘清流宜映月今夜重吟看

赴蘇州至常州荅賈舍人

杭城隔歲轉蘇臺還擁前時五馬回厭見簿書先眼合
喜逢杯酒暫眉開未酬恩寵年空去欲立功名命不來

一別承明三領郡甘從人道是麤才

去歲罷杭州今春領吳郡慙無善政聊寫鄙懷

兼寄三相公

為問三相相如何秉國鈞那將最劇郡付與苦慵人豈
有吟詩客堪為持節臣不才空飽暖無惠及飢貧昨卧
南城月今行北境春鉛刀磨欲盡銀印換何頻杭老遮
車轍吳童掃路塵虛迎復虛送慙見兩州民

宣武令狐相公以詩寄贈傳播吳中聊奉短章

用申酬謝

新詩傳詠忽紛紛楚老吳娃耳徧聞盡解呼為好才子

不知官是

一作在

上將軍辭人命薄多無位戰將功高少

有文謝朓篇章韓信鉞一生雙得不如君

自詠

形容瘦薄詩情苦豈是人間有相人只合一生眠白屋
何因三度擁朱輪金章未佩雖非貴銀盃常攜亦不貧
唯是無兒頭早白被天磨折恰平均

吟前篇因寄微之

君顏貴茂不清羸
君句雄華不苦悲
何事遣君還似我
髭鬚早白亦無兒

紫薇花

紫薇花對紫薇翁
名目雖同貌不同
獨占芳菲當夏景
不將顏色託春風
潯陽官舍雙高樹
興善僧庭一大叢
何似蘇州安置處
花堂欄下月明中

自到郡齋僅經旬
日方專公務未及
宴遊偷閒

走筆題二十四韻兼寄常州賈舍人湖州崔郎
中仍呈吳中諸客

渭北離鄉客江南守土臣涉途初改月入境已經旬
甲郡標天下環封極海濱版圖十萬戶兵籍五千人自顧

才能少何堪寵命頻冒榮慙印綬虛獎負絲綸

除蘇州制云藏

於己為道義施於物為政能在公
形骨鯁之志闔境有袴襦之樂

候病須通脉防流要

塞津救煩無若靜補拙莫如勤削使科條簡攤令賦役
均以茲為報効安敢不躬親襦袴提於手韋弦佩在紳

敢辭稱俗吏且願活疲民常

州常

未徵黃霸湖

州湖

猶借寇

恂媿無鐫脚政

河北三郡相鄰皆有善政時為鐫脚刺史見唐書

徒忝犬牙鄰

制誥

一作詔

誇黃絹

美賈常州也

詩篇占白蘋

美崔吳興也

銅符拋

不得

自謂也

瓊樹見無因警寐鐘傳夜催衙鼓報晨唯知

對胥吏未暇接親賓色變雲迎夏聲殘鳥過春麥風非

逐扇梅雨異隨輪武寺山如故

武丘寺也

王樓月自新

郡內東南

樓名也

池塘閒長草絲竹廢生塵暑遣燒神耐晴教睬舞

茵待還公事了亦擬樂吾身

題龍鶴

經旬不飲酒踰月未聞歌豈是風情少其如塵事多虎
丘慙客問娃館妬人過莫笑龍中鶴相看去幾何

荅客問杭州

為我踟躕停酒盞與君約略說杭州山名天竺堆青黛
湖號錢塘瀉綠油大屋簷多裝鴈齒小航船亦畫龍頭
所嗟水路無三百官繫何因得再遊

登閭門閒望

閨門四望鬱蒼蒼始覺州雄土俗強十萬夫家供課稅
五千子弟守封疆闔城碧鋪秋草烏鵲橋紅帶夕陽
處處樓前飄管吹家家門外泊舟航雲埋虎寺山藏色
月耀娃宮水放光曾賞錢唐嫌一作茂苑今來未敢苦
誇張

代諸妓贈送周判官

妓筵今夜別姑蘇客擢明朝向鏡湖莫汎扁舟尋范蠡
且隨五馬覓羅敷蘭亭月破能迴否娃館秋涼却到無

好與使君為老伴歸來休染白髭鬚

秋寄微之十二韻

娃館松江北稽城浙水東屈君為長吏伴我作衰翁旌

旆知非遠煙雲望不通忙多對酒榼興少閱詩筒

北在杭州

兩浙唱和詩贈答於筒中遞來往

淡白秋來日疎涼雨後風餘霞數片

綺新月一張弓影滿衰桐樹香凋晚蕙叢飢啼春穀鳥

寒怨絡絲蟲覽鏡頭雖白聽歌耳未聾老愁從此遣醉

笑與誰同清旦方堆案黃昏始退公可憐朝暮景銷在

兩衙中

池上早秋

荷芰綠參差新秋水滿池早涼生北檻殘照下東籬露
飽蟬聲嬾風乾柳意衰過潘二十歲何必更愁悲

郡西亭偶詠

常愛西亭面北林公私塵事不能侵共閒作伴無如鶴
與老相宜只有琴莫遣是非分作界須教吏隱合為心
可憐此道人皆見但要修行功用深

故衫

閨淡緋衫稱老身半披半曳出朱門袖中吳郡新詩本
襟上杭州舊酒痕殘色過梅看向盡故香因洗嗅猶存
曾經爛熳三年著欲棄空箱似少恩

郡中夜聽李山人彈三樂

風琴秋拂匣月戶夜開關榮啟先生樂姑蘇太守閑傳
聲千古後得意一時間却怪鍾期耳唯聽水與山

東城桂三首

并序一作
桂華曲

蘇之東城古吳都城也今為樵牧之場有桂一株
生乎城下惜其不得地因賦三絕句以唁之

子墮本從天竺寺根盤今在闔閭城當時應逐南風落

落向人間取次生

舊說杭州天竺寺每歲秋中有月桂子墮

霜雪

一作雪霰

壓多雖不死荆榛長疾欲相埋長憂落在樵

人手賣作蘇州一束柴

遙知

一作可憐

天上桂花孤試問嫦娥更要無月宮幸有閒

田地何不中央種兩株

聞行簡恩賜章服喜成長句寄之

吾年五十加朝散爾亦今年賜服章齒髮恰同知命歲

官銜俱是客曹郎

予與行簡俱年五十始著緋皆是主客郎中

榮傳錦帳花

聯萼彩動綾袍鴈赴行

緋多以鴈瑞莎為之也

大抵著緋宜老大

莫嫌秋鬢數莖霜

喚笙歌

露墜萎花槿風吹敗葉荷老心歡樂少秋眼感傷多芳
歲今如此衰翁可奈何猶應不如醉試遣喚笙歌

對酒吟

一拋學士筆三佩使君符未換銀青綬唯添雪白鬚
公門衙退掩妓席客來鋪履舄從相近謳吟任所須
金銜嘶五馬鈿帶舞雙姝不得當年有猶勝到老無
合聲歌漢月齊手拍吳歎今夜還先醉應煩紅袖扶

偶飲

三盞醺醺四體融妓亭簷下夕陽中千聲方響敲相續
一曲纔和晏未終今日心情如往日秋風氣味似春風

唯憎小吏樽前報道去衙時水五筒

早發赴洞庭舟中作

閭門曙色欲蒼蒼星月高低宿水光
櫂舉影搖燈燭動舟移聲拽管弦長
漸看海樹紅生日遙見包山白帶霜
出郭已行十五里唯消一曲慢霓裳

宿湖中

水天向晚碧沉沉樹影霞光重疊深
浸月冷波千頃練包霜新橘萬株金
幸無案牘何妨醉縱有笙歌不廢吟

十隻畫船何處宿洞庭山脚太湖心

揀貢橘書情

洞庭貢橘揀宜精太守勤王請自行珠顆形容隨日長
瓊漿氣味得霜成登山敢惜駑駘力望闕難伸螻蛄情
疎賤無由親跪獻願憑朱實表丹誠

夜泛陽塢入明月灣即事寄崔湖州

湖山處處好淹留最愛東灣北塢頭掩映橘林千點火
泓澄潭水一盆油龍頭畫舸銜明月鵲脚紅旗蘸碧流

為報茶山崔太守與君各是一家遊

嘗羨吳興每春茶山之遊泊入太湖

羨意減矣故云

泛太湖書事寄微之

煙渚雲帆處處通
飄然舟似入虛空
玉杯淺酌巡初匝
金管徐吹曲未終
黃夾纈林寒有葉
碧琉璃水淨無風
避旗飛鷺翩翩白
驚鼓跳魚撥刺紅
澗雪壓多松偃蹇
巖泉滴久石玲瓏
書為故事留湖上

所見勝景多記在湖中石上吟

作新詩寄浙東軍府威容從道盛
江山氣色定知同報

君一事君應羨五宿澄波皓月中

題新館

曾為白社羈遊客今作朱門醉飽身
十萬戶州尤覺貴二千石祿敢言貧
重裘每念單衣士兼味嘗思旅食人
新館寒來多少客欲回歌酒暖風塵

西樓喜雪命宴

宿雲黃慘澹曉雪白飄颻散麪遮槐市
堆花壓柳橋四郊鋪縞素萬室枕瓊瑤
銀榼攜桑落金爐上麗譙光迎

舞妓動寒近醉人銷歌樂雖盈耳慙無五袴謠

新栽梅

池邊新種七株梅欲到花時點檢來莫怕長洲桃李妬
今年好為使君開

酬劉和州戲贈

錢唐山水接蘇臺兩地褰帷媿不才政事素無爭學得
風情舊有且將來雙蛾解珮啼相送五馬鳴珂笑却回
不似劉郎無景行長拋春恨在天台

戲和賈常州醉中二絕句

聞道毗陵詩酒興
近來積漸學姑蘇
卷頭新令從偷去
刮骨清吟得侶無

越調管吹留客曲
吳吟詩送暖寒栢
娃宮無限風流事
好遣孫心暫學來

歲暮寄微之三首

微之別久能無歎
知退書稀豈免愁
甲子百年過半後
光陰一歲欲終頭
池冰曉合膠船底
樓雪晴銷露瓦溝

自覺歡情隨日減蘇州心不及杭州

榮進雖頻退亦頻與君才命不調勻若不九重中掌事
即須千里外拋身紫垣南北廳曾對滄海東西郡又鄰
唯欠結廬嵩洛下一時歸去作閒人

白頭歲暮苦相思除却悲吟無可為枕上從妨一夜睡

燈前讀盡十年詩

讀前後
唱和詩

龍鍾校正騎驢日顚顚通江

司馬時

通州
江州

若並如今是全活紆朱拖紫且開眉

歲日家宴戲示弟姪等兼呈張侍御二十八丈

殷判官二十三兄

弟妹妻孥小姪甥嬌癡弄我助歡情
歲盡後推藍尾酒
春盤先勸膠去聲牙錫形骸潦倒雖堪歎
骨肉團圓亦可榮
猶有誇張少年處
笑呼張丈喚殷兄

正月三日閒行

黃鸝巷口鶯欲語
烏鵲河頭冰欲銷

黃鸝坊名
烏鵲河名

綠浪東

西南北水紅欄三百九十橋

蘇之官
橋大數

鴛鴦蕩漾雙雙翅

楊柳交加萬萬條
借問春風來早晚
只從前日到今朝

夜歸

逐勝移朝宴留歡放晚衙
賓寮多謝客騎從半吳娃到
處銷春景歸時及月華
城陰一道直燭焰兩行斜
東吹先催柳南霜不殺花
臯橋夜沽酒燈火是誰家

自歎

豈獨年相迫兼為病所侵
春來痰氣動老去嗽聲深
眼暗猶操筆頭斑未挂簪
因循過日月真是俗人心

郡中閒獨寄微之及崔湖州

少年賓旅非吾輩晚歲簪纓束我身酒散更無同宿客
詩成長作獨吟人蘋洲會面知何日鏡水離心又一春
兩處也應相憶在官高年長少情親

小舫

小舫一艘新造了輕裝梁柱庫安蓬深坊靜岸遊應徧
淺水低橋去盡通黃柳影籠隨擢月白蘋香起打頭風
慢牽欲傍櫻桃泊借問誰家花最紅

馬墜強出贈同座

足傷遭馬墜腰重倩人擡抵合窗間卧何由花下來坐
依桃葉妓行呷地黃栢強出非他意東風落盡梅

夜聞賈常州崔湖州茶山境會想羨歡宴因寄

此詩

遙聞境會茶山夜珠翠歌鐘俱遶身盤下中分兩州界
燈前合作一家春青娥遶舞應爭妙紫笋齊嘗各鬪新
自歎花時北窗下蒲黃酒對病眠人

時馬墜損腰
正勸蒲黃酒

酬微之開拆新樓初畢相報末聯見戲之作

海山鬱鬱石稜稜
新豁高居正好登
南臨膽部三千界
東對蓬宮十二層
報我樓成秋望月
把君詩讀夜回燈
無妨却有他心眼
妝點亭臺即不能

病中多雨逢寒食

水國多陰常嬾出
老夫饒病愛閒眠
三旬卧度鶯花月
一半春銷風雨天
薄暮何人吹感策
新晴幾處縛鞦韆
綵繩芳樹長如舊
唯是年年換少年

清明夜

好風隴月清明夜碧砌紅軒刺史家獨遶迴廊行復歇
遙聽弦管暗看花

蘇州柳

金谷園中黃嬋娜曲江亭畔碧婆娑

一作
髡

娑老來處處遊

行

一作
行應

徧不似蘇州柳最多絮撲白頭條拂面使君無

計奈春何

三月二十八日贈周判官

一春惆悵殘三日醉問周郎憶得無柳絮送人鶯勸酒

去年今日別東都

偶作

紅杏初生葉青梅已綴枝
蘭珊花落後寂寞酒醒時坐
悶低眉久行慵舉足遲少年
君莫怪頭白自應知

重荅劉和州

來篇云蘇州刺史例能詩西掖吟
來替左司又云若共吳王聞百草

不如唯是
欠西施

分無佳麗敵西施敢有文章替左司
隨分笙歌聊自樂
等閒篇詠被人知
花邊妓引尋香徑月下僧留宿劒池

可惜當時好風景吳王應不解吟詩

採香徑在館娃宮

奉送三兄

少年曾管二千兵
晝聽笙歌夜斫營
自反丘園頭盡白
每逢旗鼓眼猶明
杭州暮醉連牀卧
吳郡春遊並馬行
自媿阿連官職慢
只教兄作使君兄

城上夜宴

留春不住登城望
惜夜相將秉燭遊
風月萬家河兩岸
笙歌一曲郡西樓
詩聽越客吟何苦
酒被吳娃勸不休

從道人生都是夢夢中歡笑亦勝愁

重題小舫贈周從事兼戲微之

細蓬青篾織魚鱗小眼紅窗襯麴塵
濶狹纔容從事座高低恰稱使君身
舞筵須揀腰輕女仙擢難勝骨重人
不似鏡湖廉使出高檣大艫鬧驚春

吳櫻桃

含桃最說出東吳香色鮮穠氣味殊
洽恰舉頭千萬顆婆娑拂面兩三株
鳥偷飛處銜將火人摘爭時蹋破珠

可惜風吹兼雨打明朝後日即應無

春盡勸客酒

林下春將盡池邊日半斜櫻桃落砌顚夜合隔簾花
酒留閒客行茶使小娃殘花勸不飲留醉向誰家

仲夏齋居偶題八韻寄微之及崔湖州

腥血與葷蔬停來一月餘飢膚雖瘦損方寸任清虛
體適通宵坐頭慵隔日梳眼前無俗物身外即僧居
水榭風來遠松廊雨過初寒簾放巢燕投食施池魚久別閒

遊伴頻勞問疾書不知湖與越吏隱興何如

官宅

紅紫共紛紛祇承老使君移舟木蘭櫂行酒石榴裛水
色窗窗見花香院院聞戀他官舍住雙鬢白如雲

六月三日夜聞蟬

荷香清露墜柳動好風生微月初三夜新蟬第一聲乍
聞愁北客靜聽憶東京我有竹林宅別來蟬再鳴不知
池上月誰撥小船行

蓮石

青石一兩片白蓮三四枝寄將東洛去心與物相隨石
倚風前樹蓮栽月下池遙知安置處預想發榮時領郡
來何遠還鄉去已遲莫言千里別歲晚有心期

眼病二首

散亂空中千片雪蒙籠物上一重紗縱逢晴景如看霧
不是春天亦見花

已上四句皆病
眼中所見者

僧說客塵來眼界醫

言風眩在肝家兩頭治療何曾瘥藥力微茫佛力賒

眼藏損傷來已久病根牢固去應難
醫師盡勸先停酒
道侶多教早罷官
案上謾鋪龍樹論
盒中虛撚決明丸
人間方藥應無益
爭得金篦試刮看

題東武

一作虎

丘寺六韻

香剎看非遠祇園入始深
龍蟠松矯矯玉立竹森森
怪石千僧坐靈池一劒沈
海當亭兩面山在寺中心
酒熟

一作熱

憑花勸詩成倩鳥吟
寄言軒冕客此地好抽簪

夜遊西武

一作虎

丘寺八韻

不厭西丘寺閒來即一過舟船轉雲島樓閣出煙蘿路
入青松影門臨白月波魚跳驚秉燭猿覩怪鳴珂搖曳
雙紅旆娉婷十翠娥容滿蟬態等十妓從遊也香花助羅綺鐘梵避
笙歌領郡時將久遊山數幾何一年十二度非少亦非
多

詠懷

蘇杭自昔稱名郡牧守當今當好官兩地江山蹋得徧
五年風月詠將一作來殘幾時酒醞曾拋却何處花枝不

把看白髮滿頭歸得也詩情酒興漸闌珊

重詠

日覺雙眸暗年驚兩鬢蒼病應無處避老更不宜忙徇俗心情少休官道理長今秋歸去定何必重思量

百日假滿

心中久有歸田計身上都無濟世才長告初從百日滿故鄉元約一年回馬辭轅下頭高舉鶴出籠中翅大開但拂衣行莫回顧的無官職趁人來

九日寄微之

眼闇頭風事事妨，遶籬新菊為誰黃。
閒遊日久心慵倦，痛飲年深肺損傷。
吳郡兩回逢九月，越州四度見重陽。
怕飛杯酒多分数，厭聽笙歌舊曲章。
蟋蟀聲寒初過雨，茱萸色淺未經霜。
去秋共數登高會，又被今年減一場。

題報恩寺

好是清涼地，都無繫絆身。
晚晴宜野寺，秋景屬閒人。
淨石堪敷坐，寒泉可濯巾。
自慙容鬢上，猶帶郡庭塵。

晚起

卧聽簌簌衙鼓聲起遲睡足長心情華簪脫後頭雖白
堆案拋來眼校明閒上籃輿乘興出醉回花舫信風行
明朝更濯塵纓去聞道松江水最清

自思益寺次楞伽寺作

朝從思益峰遊後晚到楞伽寺歇時照水姿容雖已老
上山筋力未全衰行逢禪客多相問坐倚漁舟一自思
猶去懸車十五載休官非早亦非遲

松江亭攜樂觀漁宴宿

震澤平蕪岸

松一作吳

江落葉波在官常夢想為客始經

過水面排罾網船頭簇綺羅朝盤鱸紅鯉夜燭舞青娥

雁斷知風急潮

一作湖

平見

一作得

月多繁絲與促管不解

和漁歌

宿靈巖寺上院

高高白月上青林客去僧歸獨夜深葦血屏除唯對酒
歌鐘放散只留琴更無俗物當人眼但有泉聲洗我心

最愛曉亭東望好太湖煙水綠沈沈

酬別周從事二首

腰痛拜迎人客倦眼昏勾押簿書難辭官歸去緣衰病
莫作陶潛范蠡看

洛下田園久拋擲吳中歌酒莫留連嵩陽雲樹伊川月
已校歸遲四五年

武丘寺路

去年重開寺路桃李
蓮荷約種數千株

自開山寺路水陸往來頻銀勒牽驕馬花船載麗人
芝

荷生欲徧桃李種仍新好住湖堤上長留一道春

齊雲樓晚望偶題十韻兼呈馮侍御周殷二協

律

樓在蘇州

潦倒宦情盡蕭條芳歲闌欲辭南國去重上北城看
復疊江山壯平鋪井邑寬人稠過楊府坊闌半長安
插霧峰頭沒穿霞日脚殘水光紅漾漾樹色綠漫漫
約略留遺愛殷勤念舊歡病拋官職易老別友朋難
九月全無熱西風亦未寒齊雲樓北面半日凭欄干

河亭晴望

九月八日

風轉雲頭歛煙銷水面開
晴虹橋影出秋雁櫓聲來
郡靜官初罷鄉遙信未迴
明朝是重九誰勸菊花杯

留別微之

千時久與本心違
悟道深知前事非
猶厭勞形辭郡印

那將

一作能

赴伴著朝衣
五千言裏教知足
三百篇中勸

式微少室雲邊伊水畔
比君校老合先歸

自喜

自喜天教我少緣家徒行計兩翩翩身兼妻子都三口
鶴與琴書共一船僮僕減來無冗食資糧算外有餘錢
攜將貯作丘中費猶免飢寒得數年

武丘寺路宴留別諸妓

銀泥裙映錦障泥畫舸停橈馬簇蹄清管曲終鸚鵡語
紅旗影動駮轡一作潑汗嘶漸消醉色朱顏淺欲語離情翠

黛低莫忘使君吟詠處女墳湖北武丘西

一作虎

江上對酒二首

酒助疎頑性，琴資緩慢情。
有傭將送老，無智可勞生。
忽忘機，坐偃偃，任運行。
家鄉安處是，那獨在神京。
久貯滄浪意，初辭桎梏身。
昏昏常帶酒，默默不應人。
坐穩便箕踞，眠多愛欠伸。
客來存禮數，始著白綸巾。

望亭驛酬別周判官

何事出長洲，連宵飲不休。
醒應難作別，歡漸少於愁。
燈火穿村市，笙歌上驛樓。
何言五十里，已不屬蘇州。

見小姪龜兒詠燈詩并臘娘製衣因寄行簡

已知臘子能裁服復報龜兒解詠燈巧婦才人常薄命
莫教男女苦多能

酒筵上荅張居士

但要前塵

一作程

減無妨外相同雖過酒肆上不離道場

中弦管聲非實花鈿色是空何人知此義唯有淨名翁

鸚鵡

隴西鸚鵡到江東養得經年背漸紅常恐思歸先剪翅
每因餒食暫開籠人憐巧語情雖重鳥憶高飛意不同

應似朱門歌舞妓深藏牢閉後房中

聽琵琶妓彈略略

腕軟撥頭輕新教略略成四弦千遍語一曲萬重情
法向師邊得能從意上生莫欺江外手別是一家聲

寫新詩寄微之偶題卷後

寫了吟看滿卷愁淺紅牋紙小銀鈎未容寄與微之去
已被人傳到越州

寶歷二年八月三十日夜夢後作

塵纓忽解誠堪喜
世網重來未可知
莫忘全吳館中夢
嶺南泥雨步行時

與夢得同登棲靈塔

一無
棲字

半月悠悠在廣陵
何樓何塔不同登
共憐筋力猶堪在
上到棲靈第九層

夢蘇州水閣寄馮侍御

揚州驛裏夢蘇州
夢到花橋水閣頭
覺後不知馮侍御

一作
御史此中昨夜共誰遊


喜罷郡

五年兩郡亦堪嗟
偷出遊山走看花
自此光陰為已有
從前日月屬官家
樽前免被催迎使
枕上休聞報坐衙
睡到午時歡到夜
回看官職是泥沙

荅次休上人

來篇云聞有餘霞千萬
首何妨一句乞閒人

姓白使君無麗句
名休座主有新文
禪心不合生分別
莫愛餘霞嫌碧雲



御定全唐詩卷四百四十七

欽定四庫全書

集部

御定全唐詩卷四百四十八

詳校官庶吉士臣胡鈺

主事銜臣徐以坤覆勘

總校官知縣臣繆琪

校對官助教臣羅萬選

謄錄監生臣姚培雯

欽定四庫全書

御定全唐詩卷四百四十八

白居易

感悟妄緣題如上人壁

自從為駉童直至作衰翁所好隨年異為忙終日同
弄沙成佛塔銷玉謁王宮彼此皆兒戲湏臾即色空有營
非了義無著是真宗兼恐勤脩道猶應在妄中

思子臺有感二首

凡題思子臺者皆罪江充于
觀禍胎不獨在此偶以二絕

句辨之

曾家機上聞投杼尹氏園中見掇蜂但以恩情生隙罅
何人不解作江充

閤生魑魅蠹生蟲何異讒生疑阻中但使武皇心似燭
江充不敢作江充

賦得邊城角

邊角兩三枝霜天隴上兒望鄉相並立向月一時吹戰
馬頭皆舉征人手盡垂鳴鳴三奏罷城上展旌旗

憶洛中所居

忽憶東都宅春來事宛然雪銷行徑裏水上卧房前
厭綠栽黃竹嫌紅種白蓮醉教鶯送酒閒遣鶴看船
幸是林園主慙為食祿牽宦情薄似紙鄉思急於弦
豈合姑蘓守歸休更待年

想歸田園

戀他朝市求何事想取丘園樂此身千首惡詩吟過日
一壺好酒醉消春歸鄉年亦非全老罷郡家仍未苦貧

快活不知如我者人間能有幾多人

琴茶

兀兀寄形羣動內陶陶任性一生間
自拋官後春多醉不讀書來老更閒
琴裏知聞唯淥水茶中故舊是蒙山
窮通行止長相伴誰道吾今無往還

贈楚州郭使君

淮水東南第一州山園雉堞月當樓
黃金印綬懸腰底白雪歌詩落筆頭
笑看兒童騎竹馬醉攜賓客上仙舟

當家美事堆身上何啻林宗與細侯

和郭使君題枸杞

一作枸杞
寄郭使君

山陽

一作陰

太守政嚴明吏

一作夜

靜人安無犬驚不知靈

藥根成狗怪得時聞吠夜聲

初到洛下

一作陽

閒遊

漢庭重少身宜退洛下閒居迹可逃
趣伴入朝應老醜
尋春放醉尚粗豪
詩攜綵紙新裝卷
酒典緋花舊賜袍
曾在東方千騎上
至今躡蹠馬頭高

醉贈劉二十八使君

為我引杯添酒飲與君把箸繫盤歌詩稱國手徒為爾
命壓人頭不奈何舉眼風光長寂寞滿朝官職獨蹉跎
亦知合被才名折二十三年折太多

太湖石

煙翠三秋色波濤萬古痕削成青玉片截斷碧雲根風
氣通巖穴苔文護洞門三峰具體小應是華山孫

過敷水

垂鞭欲渡羅敷水處分鳴騶且緩驅秦氏雙蛾久冥漠
蘓臺五馬尚踟躕村童店女仰頭笑今日使君真是愚

南院

林院無情緒經春不一開楊花飛作穗榆莢落成堆壯
氣一作志從中減流年逐後催只應如過客病去老迎來

閒詠

步月憐清景眠松愛綠陰早年詩思苦晚歲道情深夜
學禪多坐秋牽興暫吟悠然兩事外無處更留心

初授祕監拜賜金紫閒吟小酌偶寫所懷

紫袍新祕監白首舊書生鬢雪人間壽腰金世上榮子
孫無可念產業不能營酒引眼前興詩留身後名閒傾
三數酌醉詠十餘聲便是羲皇代先從心太平

新昌閒居招揚郎中兄弟

紗巾角枕病眠翁忙少閒多誰與同但有雙松當砌下
更無一事到心中金章紫綬堪如夢皂蓋朱輪別似空
暑月貧家何所有客來唯贈北窗風

祕省後廳

槐花雨潤新秋地
桐葉風翻欲夜天
盡日後廳無一事
白頭老監枕書眠

松齋偶興

置心思慮外
滅跡是非間
約俸為生計
隨官換往還
耳煩聞曉角
一作鼓眼醒見秋山
賴此松簷下
朝回半日閒

和楊郎中賀楊僕射致仕後楊侍郎門生合宴
席上作

業重關西繼大名恩深闕下遂高情
祥鱣降伴趨庭鯉賀燕飛和出谷鶯
范蠡舟中無子弟疏家席上欠門生
可憐玉樹連桃李從古無如此會榮

松下琴贈客

松寂風初定琴清夜欲闌偶因羣動息
試撥一聲看寡鶴當徽怨秋泉應指寒
慙君此傾聽本不為君彈

秋齋

晨起秋齋冷蕭條稱病容清風兩窗竹
白露一庭松阮

籍謀身拙嵇康向事慵生涯別有處浩氣在心胸

塗山寺獨遊

野徑行無伴僧房宿有期塗山來去熟唯是馬蹄知

登觀音臺望

一作城

百千家似圍棋局十二街如種菜畦遙認微微入朝火
一條星宿五門西

登靈

一作寶

應臺北望

臨高始見人寰小對遠方知色界空回首却歸朝市去

一稊米落太倉中

酬裴相公題興化小池見招長句

為愛小塘招散客不嫌老監與新詩山公

一作翁

倒載無

妨學范蠡扁舟未要追蓬斷偶飄桃李徑鷗驚誤拂鳳
皇池敢辭課拙訓高韻一勺爭禁萬頃陂

閒行

五十年來思慮熟忙人應未勝閒人林園傲逸真成貴
衣食單疎不是貧專掌圖書無過地遍尋山水自由身

儻年七十猶強健尚得閒行十五春

閒出

兀兀出門何處去新昌街晚樹陰斜馬蹄知意緣行熟
不向楊家即庾家

與僧智如夜話

嬾鈍尤知命幽棲漸得朋門閒無謁客室靜有禪僧爐
向初冬火籠停半夜燈憂勞緣智巧自喜百無能

憶廬山舊隱及洛下新居

形骸僂俛班行內骨肉白留俸祿中無奈攀緣隨手長
亦知恩愛到頭空草堂久閉廬山下竹院新拋洛水東
自是未能歸去得世間誰要白鬚翁

晚寒

晚一作
暝

急景流如箭淒風利似刀暝催雞翅斂寒束樹枝高縮
水濃和酒加絲厚絮袍可憐冬計畢暖卧醉陶陶

偶眠

偶一作
醉

放柘書案上枕臂火爐前老愛尋思事

一作
睡

慵多

一作
便

取次眠妻教卸烏帽婢與展青氊便是屏風樣何勞畫
古賢

華城西北雉堞最高崔相公首創樓臺錢左丞
繼種花果合為勝境題在雅篇歲暮獨遊悵然

成詠

時華州未
除刺史

高居稱君子瀟灑四無鄰丞相棟梁久使君桃李新凝
情看麗句駐步想清塵况是寒天客樓空無主人

奉使途中戲贈張常侍

早風吹土滿長衢驛騎星軺盡疾驅共笑籃舁一作攀亦
稱使日馳一驛向東都

有小白馬乘馭多時奉使東行至稠桑驛溘然
而斃足可驚傷不能忘情題二十韻

能驟復能馳翩翩白馬兒毛寒一團雪鬃薄萬條絲早
蓋春行日驪駒曉從一作促時雙旌前獨步五馬內偏騎

芳草承蹄葉垂楊拂頂枝跨將迎好客惜不換妖姬慢
鞚遊蕭寺閒驅醉習池睡來乘作夢興發倚成詩鞭為

馴難下鞍緣穩不離北歸還共到東使亦相隨赭白何

曾變玄黃豈得知嘶風覺聲

一作聲覺

急踣雪怪行遲昨夜

猶芻秣今朝尚繫維卧槽應不起顧主遂長辭塵滅駸

駸迹霜留皎皎姿度關形未改過隙影難追念倍燕求

一作來

駿情深項別雕銀收鉤臆帶金卸絡頭羈何處埋

奇骨誰家覓弊帷稠桑驛門外吟罷涕雙垂

題噴玉泉

泉在壽安山下高百餘尺直瀉潭中

泉噴聲如玉潭澄色似空練垂青嶂

一作障

上珠瀉綠盆

中溜滴三秋雨寒生六月風何時此岩下來作濯纓翁

酬皇甫賓客

閒官兼慢使著處易停輪況欲逢新歲仍初見故人冒
寒尋到洛待煖始歸秦亦擬同攜手城東畧看春

種白蓮

吳中白藕洛中栽莫戀江南花嬾開萬里攜歸爾知否
紅蕉朱槿不將來

答蘓庶子

偶作關東使重陪洛下遊病來從斷酒老去可禁愁款
曲偏青眼蹉跎各白頭蓬山閒氣味依約似龍樓

答尉遲少監水閣重宴

人情依舊歲華新今日重招徃日賓雞黍重回千里駕
林園閣換四年春水軒平寫琉璃鏡草岸斜鋪翡翠茵
聞道經營費心力忍教成後屬他人

時主人欲
賣林亭

和劉郎中傷鄂姬

不獨君嗟我亦嗟西風北雪殺南花不知月夜魂歸處

鸚鵡洲頭第幾家

姬鄂人也

贈東鄰王十三

攜手池邊月開襟竹下風驅愁知酒力破睡見茶功居
處東西接年顏老少同能來為伴否伊上作漁翁

早春同劉郎中寄宣武令狐相公

梁園不到一年強遙想清吟對綠觴更有何人能飲酌
新添幾卷好篇章馬頭拂柳時回轡豹尾穿花暫亞槍
誰引相公開口笑不逢白監與劉郎

寄太原李相公

聞道北都今一變政和軍樂萬人安綺羅二八圍賓榻
組練三千夾將壇蟬鬢應誇丞相少貂裘不覺太原寒
世間大有虛榮貴百歲無君一日歡

雪中寄令狐相公兼呈夢得

兔園春雪梁王會想對金罍詠玉塵今日相如身在此
不知客右坐何人

出使在途所騎馬死改乘肩輿將歸長安偶詠

旅懷寄太原李相公

驛路崎嶇泥

一作况

雪寒欲登籃輦一長嘆風光不見桃

花騎塵土空留杏葉鞍喪乘獨歸殊不易脫驂相贈豈
為難并州好馬應無數不怕旌旄試覓看

有雙鶴留在洛中忽見劉郎中依然鳴顧劉因
為鶴嘆二篇寄子予以二絕句答之

辭鄉遠隔華亭水逐我來棲緱嶺雲慚媿稻粱長不飽
未曾回眼向雞羣

荒草院中池水畔
銜恩不去又經春
見君驚喜雙回顧
應為吟聲似主人

宿竇使君莊水亭

使君何存在江東
池柳初黃杏欲紅
有興即來閒便宿
不知誰是主人翁

龍門下作

龍門澗下濯塵纓
擬作閒人過此生
筋力不將諸處用
登山臨水詠詩行

姚侍御見過戲贈

晚起春寒慵裹頭
客來池上偶同遊
東臺御史多提舉
莫按金章繫布裘

履道春居

微雨灑園林
新晴好一尋
低風洗池面
斜日拆花心
暝助嵐陰重
春添水色深
不如陶省事
猶抱有絃琴

題洛中第宅

水木誰家宅
門高占地寬
懸魚挂青甃
行馬護朱欄
春

榭籠煙煖秋庭鎖月寒
松膠粘琥珀筠粉撲琅玕
試問池臺主多為將相官
終身不曾到唯展宅圖看

寄殷協律

多叙江南舊遊

五歲優游同過日一朝消散侶浮雲
琴詩酒伴皆拋我雪月花時最憶君
幾度聽雞歌白日亦曾騎馬詠紅綰

予在杭州日有歌云聽唱黃雞與白日又有詩云著紅騎馬是何人
吳娘暮雨蕭蕭曲自

別江南更不聞

江南吳二娘曲詞云暮雨蕭蕭郎不歸

洛下諸客就宅相送偶題西亭

几榻臨池坐軒車冒雪過交親致枯酒僮僕解笙歌流
歲行將晚浮榮得幾多林泉應問我不住意如何

答林泉

好住舊林泉回頭一悵然漸知吾潦倒深愧爾留連欲
作棲雲計須營種黍錢更容求一郡不得亦歸田

將發洛中枉令狐相公手札兼辱二篇寵行以
長句答之

尺素忽驚來梓澤雙金不惜送蓬山八行落泊飛雲雨

五字鎗鏃動珮環玉韻乍聽堪醒酒銀鈎細讀當披顏
收藏便作終身寶何啻三年懷袖間

臨都驛答夢得六言二首

揚子津頭月下臨都驛裏燈前昨日老於前日去年春
似今年

謝守歸為秘監馮公老作郎官前事不須問著新詩且
更吟看

喜錢左丞再除華州以詩伸賀

左轄輟中臺門東委上才彤襜經宿到絳帳及春開民望懇難奪天心慈易回那知不隔歲重借冠恂來

和錢華州題少華清光絕句

高情雅韻三峯守主領清光管白雲自笑亦曾為刺史
蘇州肥膩不如君

送陝府王大夫

金馬門前回劍珮鐵牛城下擁旌旗他時萬一為交代
留取甘棠三兩枝

代迎春花招劉郎中

幸與松筠相近栽，不隨桃李一時開。
杏園豈敢妨君去，未有花時且看來。

翫迎春花贈楊郎中

金英翠萼帶春寒，黃色花中有幾般。
馮君與一作語向遊人道，莫作蔓菁花眼看。

閒出

身外無羈束，心中少是非。
被花留便住，逢酒醉方歸。

事行時少官曹入日稀春寒遊正好穩馬薄綿衣

座上贈盧判官

把酒承花花落頻花香酒味相和春莫言不是江南會
虛白亭中舊主人

曲江有感

曲江西岸又春風萬樹花前一老翁遇酒逢花還且醉

若一作莫論惆悵事何窮

杏園花下贈劉郎中

怪君把酒偏惆悵曾是貞元花下人自別花來多少事
東風二十四回春

花前有感兼呈崔相公劉郎中

落花如雪鬢如霜醉把

一作拾

花看益自傷少日為名

一作

文多檢束長年無興可顛狂四時輪轉春常少百刻支

分夜苦長何事同生

一作共同

壬子歲老於崔相及劉郎

余與

崔劉年同
獨早衰白

微之就拜尚書居易續除刑部因書賀意兼詠

離懷

我為憲部入南宮君作尚書鎮浙東老去一時成白首
別來七度換春風簪纓假合虛名在筋力銷磨實事空
遠地官高親故少此些談笑與誰同

喜與韋左丞同入南省因叙舊以贈之

早年同遇陶鈞主利鈍精粗共在鎔

憲宗朝與韋同入翰林

金劍

淬來長透匣鉛刀磨盡不成鋒差肩北省慙非據接武
南宮幸再容跛鼈雖遲騏驎病何妨中路亦相逢

伊州

老去將何散老愁
新教小玉唱伊州
亦應不得多年聽
未教成時已白頭

早朝

鼓動出新昌
雞鳴赴建章
翩翩穩鞍馬
楚楚健衣裳
宮漏傳殘夜
城陰送早涼
月堤槐露氣
風燭棹煙香
雙闕龍相對
千官鴈一行
漢庭方尚少
慙嘆鬢如霜

答裴相公乞鶴

一作酬裴相公乞予雙鶴

驚露聲音好冲天相貌殊終宜向遼廓不稱在泥塗白
首勞為伴朱門幸見呼不知疎野性解愛鳳池無

晚從省歸

朝回北闕值清晨晚出南宮送暮春
入去丞郎非散秩歸來詩酒是閒人
猶思泉石多成夢尚嘆簪裾未離身
終是不如山下去心頭眼底兩無塵

北窗閒坐

虛窗兩叢竹靜室一爐香
門外紅塵合城中白日忙
無

煩尋道士不要學仙方自有延年術心閒歲月長

酬嚴給事

聞玉樂花下有遊仙絕句

羸女偷乘鳳去時洞中潛歇弄瓊枝不緣啼鳥春饒舌
青瑣仙郎可得知

京路

西來為看秦山雪東去緣尋洛苑春來去騰騰兩京路
閒行除我更無人

華州西

每逢人靜慵多歇不計程行困即眠上得籃轎未能去
春風敷水店門前

從陝至東京

從陝至東京山低路漸平風光四百里車馬十三程花
共垂鞭看枯多並轡傾笙歌與談笑隨分自將行

送春

銀花鑿落從君勸金屑琵琶為我彈不獨送春兼送老
更嘗一酌更聽看

宿杜曲花下

覓得花千樹攜來酒一壺
嬾歸兼擬宿未醉豈勞扶
但惜春將晚寧愁日漸晡
籃輿為卧舍漆盞是行厨
斑竹盛茶櫃紅泥罨飯爐
眼前無所闕身外更何須
小面琵琶婢蒼頭
屬簾奴從君飽富貴
曾作此遊無

逢舊

久別偶相逢俱疑是

一作似

夢中即今歡樂事放醺又成

空

繡婦嘆

連枝花樣繡羅襦本擬新年餉小姑
自覺逢春饒悵望誰能每日趁功夫
針頭不解愁眉結線縷難穿淚臉珠
雖凭繡牀都不繡同牀繡伴得知無

春詞

低花樹暝小妝樓春入看心兩點愁
斜倚欄干背一作臂鸚鵡思量何事不回頭

恨詞

翠黛著低斂紅珠淚暗銷從來恨人意不省似今朝

山石榴花十二韻

曄曄復煌煌花中無比方豔夭宜小院條短稱低廊本是山頭物今為砌上芳千叢相向背萬朵互低昂照灼連朱檻玲瓏映粉牆風來添意態日出助晶光漸綻臙脂萼猶含琴軫房離披亂剪綵斑駁未勻妝絳焰燈千炷紅裙妓一行此時逢國色何處覓天香恐合栽金闕思將獻玉皇好差青鳥使封作百花王

送敏中歸幽寧幕

六十衰翁兒女悲，傍人應笑爾應知。
兄弟垂老相逢日，
枯酒臨歡欲散時。
前路加飡須努力，
今宵盡醉莫推辭。
司徒知我難為別，
直過秋歸未訝遲。

宴散

小宴追涼散，平橋步月回。
笙歌歸院落，燈火下樓臺。
殘暑蟬催盡，新秋鴈帶一作戴來。
將何迎睡興，臨卧舉殘杯。

人定

人定月朧明香消枕簟清翠屏遮燭影紅袖下簾聲坐
久吟方罷眠初夢未成誰家教鸚鵡故故語相驚

池上

裊裊涼風動淒淒寒露零蘭衰花始白荷破葉猶青獨
立棲沙鶴雙飛照水螢若為寥落境仍值酒初醒

池窗

池晚蓮芳謝窗秋竹意深更無人作伴唯對一張琴

花酒

香醅淺酌浮如蟻雪鬢新梳薄似蟬為報洛城花酒道
莫辭送老二三年

題崔常侍濟源莊

谷口誰家住雲扃鎖竹泉主人何處去蘿薜換貂蟬籍
在金閨內班排玉宸前誠知憶山水歸得是何年

認春戲呈馮少尹李郎中陳主簿

認得春風先到處西園南面水東頭柳初變後條猶重
花未開時枝已稠閣助醉歡尋綠酒潛添睡興著紅樓

知君未別陽和意直待春深始擬遊

魏堤有懷

魏王堤下水聲似使君灘惆悵回頭聽踏蹕立馬看蕩
風波眼急翻雪浪心寒憶得瞿唐事重吟行路難

柘枝詞

柳閣長廊合花深小院開蒼頭鋪錦褥皓腕捧銀杯繡
帽珠稠綴香衫袖窄裁將軍拄毬杖看按柘枝來

代夢得吟

後來變化三分貴同輩凋零大半無世上爭先從盡

上聲

汝人間鬪在不如吾竿頭已到應難久局勢雖遲未必輸不見山苗與林葉迎春先綠亦先枯

寄答周協律

來詩多叙
蕪州舊遊

故人叙舊寄新篇惆悵江南到眼前閣想樓臺萬餘里不聞歌吹一周年橋頭誰更看新月池畔猶應泊舊船
最憶後庭梧酒散紅屏風掩綠窗眠

御定全唐詩卷四百四十八